



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**SAMBUTAN MINGGU PERPADUAN PERINGKAT
NEGERI JOHOR**

15 MEI 2025 (KHAMIS)

**TEMPAT
DATARAN SEGAMAT**

Terima kasih pengacara majlis.

Salam Perpaduan dan Salam Malaysia MADANI

SALUTASI

**Salutasi akan diberikan secara berasingan.*

PENDAHULUAN

1. Saya merakamkan ucapan terima kasih kepada warga Jabatan Perpaduan Negara dan Integrasi Nasional Negeri Johor, Pejabat Daerah Segamat, serta jentera perpaduan atas penganjuran **Sambutan Minggu Perpaduan Peringkat Negeri Johor Tahun 2025**.
2. Tahun ini, kita mengangkat tema **“Harmoni dalam Kepelbagaian”**, satu tema yang amat bermakna, yang mencerminkan realiti keunikan negara kita. Malaysia bukan sekadar sebuah negara dengan pelbagai kaum dan budaya, tetapi sebuah **keluarga besar yang disatukan oleh nilai-nilai hormat, toleransi, dan kasih sayang**.
3. **Sambutan Minggu Perpaduan yang kini memasuki tahun ketiga** penganjurannya oleh Kementerian Perpaduan Negara, bukan sekadar satu sambutan tahunan. Ia adalah satu **manifestasi usaha berterusan untuk menanam, menyemai dan menyuburkan benih perpaduan dalam jiwa rakyat Malaysia**.

4. Perpaduan dan keharmonian tidak wujud dengan sendiri. Ia perlu **diusahakan, dipelihara, dan diperjuangkan oleh semua pihak daripada pemimpin negara hinggalah kepada rakyat biasa.** Kita mesti terus memupuk budaya dialog, sikap terbuka, dan saling menghormati dalam semua ruang dari rumah ke sekolah, dari pejabat ke medan sosial.
5. Saya juga ingin **mengajak semua lapisan masyarakat untuk terus menjadi ejen perpaduan** di mana sahaja kita berada. Jadilah contoh kepada anak-anak kita. **Bina hubungan yang harmoni dengan jiran tetangga.** Tunjukkan nilai positif dalam media sosial. Tindakan kecil hari ini akan mencorakkan masa depan yang lebih aman dan bersatu.

Hadirin yang saya kasihi sekalian,

PRA PELANCARAN JUBLI EMAS RUKUN TETANGGA

6. Dalam majlis ini juga, Kementerian akan melancarkan **Pra Pelancaran Jubli Emas Rukun Tetangga** sebagai tanda penghargaan kepada semua Jawatankuasa Rukun Tetangga (KRT) yang selama ini telah memainkan peranan penting dalam menggerakkan pelbagai **aktiviti kejiiran, menjaga keselamatan, serta memperkukuhkan jaringan sosial** antara penduduk.

7. Untuk makluman semua, pelancaran Kawasan Rukun Tetangga di Kg. Kasipillay menjadi titik tolak kepada pembentukan KRT di seluruh negara (29 Ogos 1975). **Penubuhan Rukun Tetangga yang kini genap 50 tahun membuktikan bahawa inisiatif ini adalah antara dasar paling berkesan dalam membina jati diri rakyat yang bersatu padu.**
8. Ia bukan sahaja mencerminkan keprihatinan kerajaan terhadap kesejahteraan rakyat, malah menjadikan rakyat sebagai ejen perubahan dalam mencorakkan masa depan negara. **Anggota KRT** adalah wira tidak didendang yang **menjadi tulang belakang kestabilan sosial di peringkat akar umbi.**
9. Transformasi serta **evolusi Rukun Tetangga sejak 1975** hingga kini memperlihatkan daya tahan, adaptasi, dan inovasi dalam menyesuaikan peranan mereka dengan keperluan semasa masyarakat. **Dari rondaan sukarela ke program kejrangan dan kini pembangunan ekonomi komuniti, KRT telah melakar pelbagai kejayaan dan pencapaian membanggakan di peringkat nasional mahupun negeri. Tahniah buat semua.**

10. Pemeraksanaan Rukun Tetangga Sebagai Penggerak Komuniti Progresif adalah merupakan inisiatif Kementerian melalui Jabatan Perpaduan Negara dan Integrasi Nasional (JPNIN) untuk melonjakkan lagi peranan Rukun Tetangga dalam komuniti di Malaysia. Pada tahun 2024, sebanyak 152 Rukun Tetangga dimodelkan sebagai penggerak komuniti progresif. Antara contoh kejayaan inisiatif ini:

Nama KRT	Nama Projek	Pencapaian
KRT PPR Sri Perlis, Dang Wangi, Kuala Lumpur	<i>Home made Coklat</i>	Produktiviti telah meningkat daripada penghasilan 100 kotak coklat kepada 500 kotak coklat dalam sebulan. Pendapatan telah meningkat daripada RM500.00 sebulan kepada sekurang-kurangnya RM3,000.00 sebulan.
KRT Telaga Batin, Terengganu	Tanaman Cili dan Timun Fertigasi	Pendapatan telah meningkat daripada RM3,000.00 kepada RM5,000.00 sebulan.
KRT Kg. Satey, Batu Pahat, Johor	Dapur Komuniti KRT	Pendapatan KRT telah meningkat daripada RM200.00 sebulan kepada RM1,500.00 sebulan

11. Selain itu, saya mengambil kesempatan ini, mengumumkan bahawa **Sambutan Jubli Emas 50 Tahun Rukun Tetangga Peringkat Kebangsaan** akan diadakan pada **28 Ogos 2025 di KRT Kasipillay & 29 Ogos 2025 di Galaxy Hall, Sentul.**

12. Selari dengan peredaran zaman dan 5 dekad KRT bertapak di negara ini, saya ingin mengumumkan bahawa **“Memperkasa Komuniti, Mengukuh Perpaduan”** akan menjadi **slogan baharu bagi KRT** serta hari ini juga saya akan melancarkan logo baharu KRT.

Hadirin yang saya muliakan sekalian,

PENUTUP

13. Sebelum saya mengakhiri ucapan, saya merakamkan setinggi-tinggi terima kasih kepada Yang Amat Berhormat Menteri Besar Johor, Dato' Onn Hafiz Ghazi dan Kerajaan Negeri Johor atas keprihatinan menyediakan **dana tambahan dalam Belanjawan Kerajaan Negeri Johor tahun 2025 berjumlah Ringgit Malaysia 600 ribu kepada Rukun Tetangga** yang aktif di negeri ini.

14. **Semua inisiatif ini adalah sebahagian daripada ekosistem yang lebih besar untuk memupuk integrasi nasional** secara menyeluruh, dan kementerian akan terus

memperluasnya dengan pendekatan baharu, lebih inklusif, mesra belia, serta memanfaatkan teknologi dan media sosial.

15. Namun kita harus sedar, kerajaan hanya boleh menyediakan platform. **Tanggungjawab memelihara dan memupuk perpaduan adalah tanggungjawab bersama** rakyat, keluarga, pemimpin masyarakat, guru, agamawan, pengusaha, dan setiap individu.

16. Saya yakin, dengan iltizam yang kuat daripada semua pihak, Malaysia boleh menjadi model perpaduan yang unggul di mata dunia.

Dengan penuh sukacita, saya dengan ini **merasmikan Sambutan Minggu Perpaduan Peringkat Negeri Johor dan Pra Pelancaran Jubli Emas Rukun Tetangga tahun 2025.**

Sekian, terima kasih.